

IPR-INTAN@UPM: Bekal ilmu perniagaan tani

PENGANJURAN Program Inisiatif Pendapatan Rakyat (IPR) Usahawan Tani (IPR-INTAN) di Universiti Putra Malaysia (UPM) (IPR-INTAN@UPM) bukan sekadar untuk melahirkan petani moden malah bagi membekalkan ilmu perniagaan kepada peserta untuk dimanfaatkan di masa hadapan.

Program itu adalah kerjasama UPM dan Kementerian Ekonomi yang melibatkan peserta golongan B40 untuk meningkatkan pendapatan mereka melalui pertanian berteknologi tinggi.

Perkara ini adalah sejajar hasrat negara untuk memperkukuhkan bekalan makanan negara yang kini kian meruncing atas faktor larangan eksport di sesetengah negara.

Sungguhpun program ini memberi fokus mengenai pertanian dan akuakultur, namun peserta turut diterapkan ilmu perniagaan tani dalam membantu pasaran produk secara berkesan dan betul di masa depan.

Tenaga pengajar, Sekolah Perniagaan dan Ekonomi (SPE), UPM, Prof. Dr. Rozanah Ab Rahman, berkata, penyampaian ilmu keusahawanan yang digarap dalam program ini bagi membina minda perniagaan peserta secara dinamik.

“Pengajaran asas perniagaan ini adalah penting untuk memulakan perniagaan kerana menyentuh hal ehwal perniagaan serta persediaan membawa hasil tanaman itu



Program itu adalah kerjasama UPM dan Kementerian Ekonomi yang melibatkan peserta golongan B40 untuk meningkatkan pendapatan mereka melalui pertanian berteknologi tinggi.”

untuk dipasarkan,” katanya.

Menariknya, peserta turut diberi pendedahan untuk menyediakan pelan perniagaan dan didedahkan dengan Business Model Canvas (BMC) supaya perjalanan pemasaran dan perniagaan dapat dijalankan dengan lancar kelak.

“Peserta yang ingin ke arah usahawan pertanian perlu bersedia terutama dari segi penjenamaan supaya produk tersebut dikenali oleh pelanggan dan ini juga memerlukan peserta untuk mempelajari teknik yang betul dalam memasarkan produk pertanian,” katanya.

Tambah beliau, tajuk penjenamaan ini sangat penting untuk peserta memahami prosesnya kerana berkait dengan inovasi hasil baharu dan cara produk dipasarkan juga memainkan peranan dalam memastikan

produk itu berjaya di pasaran.

“Untuk sesuatu produk itu sempurna ia mempunyai teknik, jadi kita sebagai tenaga pekerja perniagaan adalah baik untuk memahami penghasilan produk berkualiti itu perlu dalam menjayakan penjenamaan.

“Selain itu, para peserta turut mempelajari beberapa modul pengajaran secara teori iaitu modul tanaman, modul ternakan akuakultur dan modul keusahawanan. Latihan amali turut dijalankan melalui kolaborasi bersama rakan strategik industri,” katanya.

Sementara itu, tenaga pengajar modul tanaman, Dr. Puteri Edaroyati Megat Wahab, menekankan kepentingan peserta untuk mengikuti latihan ini kerana ia adalah pengetahuan asas untuk mengetahui cara penanaman yang betul bagi sesuatu tanaman.

Modul yang dibangunkan untuk IPR-INTAN diolah menggunakan modul yang dibangunkan dari Program Inkubasi Usahawantani Fakulti Pertanian, UPM.

Tambah beliau, program itu sangat baik untuk membantu golongan B40 meningkatkan ekonomi mereka serta secara langsung menjadi solusi bagi menjamin isu sekuriti makanan negara.

“Selain teori ilmu pertanian, peserta diajar praktikal secara intensif yang akan membantu mereka mendapat manfaat di lapangan kelak,” katanya.



PESERTA IPR-INTAN@UPM diberikan tunjuk ajar ketika menjalankan aktiviti pertanian.